

**Նոր ջանքեր եվրոպայում հայագիտության զարգացման ուղղությամբ. Խ.Աբովյանի անվան հայկական պետական մանկավարժական համալսարանի և Հունգարիայի Պիտեր Պազմանի անվան կաթոլիկ համալսարանի համգործակցությունը հայագիտության ոլորտում**

*Էդգար Հովհաննիսյան*  
*ՀՊՄՀ պատմության և իրավագիտության*  
*ֆակուլտետի դեկան, պ.գ.թ., դոցենտ*

Հայագիտությունը, որպես գիտությունների համակարգ, որն ուսումնասիրում է Հայաստանի և հայ ժողովրդի պատմությունը, մշակույթը, լեզուն և գրականությունը, ինչպես նաև մի շարք այլ բնագավառներ, դարեր շարունակ զարգացում է ապրել ոչ միայն հայ հետազոտողների շնորհիվ, այլև օտարազգի: Հայագիտության հարցերով մշտապես հետաքրքրվել են աշխարհի առաջատար գիտական կենտրոններն ու համալսարանները, որտեղ հիմնադրվել և ներկայում էլ գործում են տարբեր հայագիտական կենտրոններ և ամբիոններ: Տարբեր ժամանակաշրջաններում տարբեր երկրներում գործել են տասնյակ հայագետներ, որոնք ունեցել են միջազգային հեղինակություն ու ճանաչում և վերջիններիս հայագիտության զանազան հարցերին նվիրված հետազոտություններն ու աշխատությունները հանդիսացել են կարևոր և անփոխարինելի ներդրում հայագիտության զարգացման հարցում:

Ի թիվս եվրոպական այլ երկրների, հայտնի հայագետներ եղել են նաև Հունգարիայում: Հայտնի է, որ հայերը Հունգարիայում հայտնվել են դեռևս միջնադարում<sup>1</sup>: Հայերը հատկապես մեծ թիվ են կազմել Տրանսիլվանիայում<sup>2</sup>, որտեղ հիմնադրել են անգամ քաղաքներ, իսկ շատ հունգարաբնակ հայեր կարևոր ներդրում են ունեցել այդ երկրի հասարակական-քաղաքական մշակութային կյանքում, Հունգարիայի տնտեսության մեջ և բանակում<sup>3</sup>:

---

<sup>1</sup> Հայ-հունգարական պատմական և մշակութային կապերի պատմությունից: Հոդվածների ժողովածու, խմբ. Բարխուդարյան Վ., Երևան, 1983:

<sup>2</sup> Տրանսիլվանիան ներկայում ընդգրկված է Ռումինիայի մեջ:

<sup>3</sup> Бертени Иван, Армяне в политической элите Венгрии 19-ом в., Из истории армяно-украинских, венгерских и молдавских отношений (сборник статей и материалов), Ереван, 2012, сс. 123-131.

Հունգարիայի հայկական համայնքի և հայ-հունգարական հարբերությունների պատմության հարցերը<sup>4</sup> մշտապես եղել է հայ և հունգարացի պատմաբանների ուշադրության կենտրոնում: Հունգար պատմաբանները բացի նշված հարցերից հետաքրքրվել են հայագիտության հարցերով ընդհանրապես՝ կարևոր ներդրում ունենալով հայագիտության զարգացման մեջ: Հունգար հայտնի հայագետներից էր պատմաբան-արևելագետ, ՀՀ ԳԱԱ արտասահմանյան անդամ, պրոֆեսոր Էդմոնդ Շյուտցը (1916-2000թթ.)<sup>5</sup>, որը հսկայական դերակատարում է ունեցել Հունգարիայում հայագիտության և հայ-հունգարական գիտական կապերի զարգացման հարցում: Ներկայում Հունգարիայում հայագիտության զարգացման հարցում կարևոր աշխատանք է կատարում երիտասարդ հունգար հայագետներ *Բայինտ Կովաչը*:

*Հայտնի է, որ 2012թ. հայտնի իրադարձություններից հետո, երբ հունգարական կառավարությունը Ադրբեջանին արտահանձնեց* հայ սպա Գուրգեն Մարգարյանին կազնահարժ ադրբեջանցի հանցագործին, Հայաստանի հանրապետությունը պաշտոնապես դադարեցրեց դիվանագիտական հարաբերությունները Հունգարիայի հետ: Հունգարական կառավարության այս քայլը դատապարտվեց ինչպես միջազգային հանրության, այնպես էլ շատ հունգարացիների կողմից: Մասնավորապես հունգար հայագետները խիստ քննադատությամբ հանդես եկան սեփական կառավարության դեմ: Սակայն ստեղծված քաղաքական իրավիճակում և դիվանագիտական հարաբերությունների բացակայության պայմաններում անգամ անհրաժեշտություն էր ներկայանում զագացնել հումանիտար հարաբերությունները Հունգարիայի գիտակրթական հաստատությունների հետ: Այս հանգամանքը հատկապես կարևորվում է այն պարագայում, երբ արդրբեջանաթուրքական շրջանակները հսկայական միջոցներ են ներդնում այդ երկրում հակահայ քարոզչության և սեփական երկրի դրական իմիջի ձևավորման նպատակով: Գիտական համագործակցությունը կակորվում է նաև այն առումով, որ կարիք կա նորովի ուսումնասիրել Հունգարիայի հայկական հսկայական պատմամշակութային ժառանգությունը, ինչպես նաև պատրաստել նոր մասնագետներ թե՛ Հայաստանում և թե՛

---

<sup>4</sup> Տես՝ Հայ-հունգարական պատմական և մշակութային կապերի պատմությունից: Հոդվածների ժողովածու, խմբ. Բարխուդարյան Վ., Երևան, 1983:

<sup>5</sup> Բարխուդարյան Վ., «Էդմոնդ Շյուտց», պատմաբանասիրական հանդես, № 1, Երևան, 2000, էջ 290-291:

Հունգարիայում, ովքեր կմասնագիտանան Հունգարիայի հայկական ժառանգության ուսումնասիրման բնագավառում և հայագիտության մեջ ընդհանրապես:

Այս ուղղությամբ առաջին քայլը կատարվեց 2016թ. մարտին, երբ Խ.Արովյանի անվան հայկական պետական մանկավարժական համալսարանը եռամյա համգործակցության պայմանագիր ստորագրեց Արևելյան Եվրոպայի հնագույն համալսարաններից մեկի՝ Հունգարիայի Պիտեր Պազմանի Կաթոլիկ համալսարանի հետ<sup>6</sup>: Պայմանագիրը ստորագրելու նպատակով 2016թ. մարտի 22-23-ը Երևանում էր գտնվում այդ համալսարանի պատվիրակությունը՝ ռեկտոր, պրոֆեսոր Սուրոմի Սաբուչի գլխավորությամբ: Վերջինս այցի ընթացքում եղավ Մայր Աթոռ Սուրբ Էջմիածնում, հանդիպեց Ամենայն Հայոց կաթողիկոս Ն.Ս.Օ.Տ.Տ. Գարեգին Երկրորդի հետ<sup>7</sup>: Պրոֆեսոր Սուրոմի Սաբուչի Մանկավարժական համալսարանի պրոֆեսորադասախոսական կազմի և ուսանողների համար հանդես եկավ «Եկեղեցական օրենքների հայալեզու հավաքածուների ազդեցությունը համաշխարհային եկեղեցական օրենքների ձևավորման վրա» թեմայով բացառիկ դասախոսությամբ<sup>8</sup>: Հունգարական կաթոլիկական համալսարանի ռեկտորին շնորհվեց նաև ՀՊՄՀ «Պատվավոր դոկտոր»-ի կոչում: Այցի ընթացքում ՀՊՄՀ ռեկտոր, պրոֆեսոր Ռուբեն Միրզախանյանի և Պիտեր Պազմանի Կաթոլիկ համալսարանի ռեկտոր Սուրոմի Սաբուչի կողմից ստորագրվեց համագործակցության<sup>9</sup>: Ստորագրված պայմանագրով երկու համալսարանների միջև համագործակցությունը հիմնականում ենթադրում էր Պիտեր Պազմանի Կաթոլիկ համալսարանի հումանիտար և հասարակական գիտությունների ֆակուլտետի և Մանկավարժական համալսարանի պատմության և իրավագիտության ֆակուլտետի միջև: Այդ պայմանագրով նախատեսվում էր զարգացնել գիտական ու կրթական համագործակցությունը երկու համալսարանների միջև, իրականացնել ուսանողների և դասախոսական կազմի փոխանակման ծրագրեր: Պայմանագիրը հատուկ շեշտադրում էր կատարում նաև համագործակցությանը հայագիտության բնագավառում, որը նախատեսում էր Պիտեր Պազմանի Կաթոլիկ

<sup>6</sup> Պիտեր Պազմանի անվան կաթոլիկական համալսարանը հիմնադրվել է 1635թ.:

<sup>7</sup> Ամենայն Հայոց Կաթողիկոսն ընդունեց Հունգարիայի Պիտեր Պազմանի անվան Կաթոլիկ համալսարանի պատվիրակությունը,  
<http://armchurch.info/?s=%D5%80%D5%B8%D6%82%D5%B6%D5%A3%D5%A1%D6%80%D5%AB%D5%A1%D5%B5%D5%AB>

<sup>8</sup> Սույն դասախոսության նյութը տպագրվել է ՀՊՄՀ պատմության և իրավագիտության ֆակուլտետի «Պատմություն և հասարակագիտություն» տարեգրքի 2016թ. համարում, էջ 197-216:

<sup>9</sup> Համագործակցություն Հունգարիայի Պազմանի Պիտեր Կաթոլիկ համալսարանի հետ,  
[https://aspu.am/hy/content/hamagortsakcutyun\\_hungariayi\\_pazmani\\_piter\\_katolik\\_hamalsarani\\_het/#sthash.pSU4bSfB.dpbs](https://aspu.am/hy/content/hamagortsakcutyun_hungariayi_pazmani_piter_katolik_hamalsarani_het/#sthash.pSU4bSfB.dpbs)

համալսարանում բացել «Հայագիտություն» մասնագիտությամբ միջազգային ուսումնական ծրագիր: Եվ շուտով՝ 2016թ. սեպտեմբերին, ի կատարումն ստորագրված պայմանագրի և ձեռք բերված պայմանավորվածությունների, Պիտեր Պազմանի Կաթոլիկ համալսարանում որոշվում է բացել Հայագիտության ամբիոն: Կայացված որոշումը հաստատվում է Պիտեր Պազմանի կաթոլիկ համալսարանի Մեծ կանցլեր կողմից: Ամբիոնի բացման պաշտոնական արարողությունը տեղի կունենա առաջիկայում՝ 2016թ. հոկտեմբերի 21-24-ը փոխադարձ այցով Բուդապեշտ մեկնող Մանկավարժական համալսարանի պատվիրակության կողմից՝ ռեկտոր պրոֆեսոր Ռուբեն Միրզախանյանի գլխավորությամբ: Նշենք նաև, որ 2016թ. սեպտեմբերից Պիտեր Պազմանի Կաթոլիկ համալսարանի հումանիտար և հասրակական գիտությունների ֆակուլտետի պատմության ինստիտուտի ուսանողներին հնարավորություն է տրվել ստանալ հայագիտության գծով մասնագիտացում և արդեն մեկ տասնյակից ավելի հունգար ուսանողներ նախապատվությունը տվել են ձեռք բերել հենց այդ մասնագիտացումը: Իսկ 2017թ. այդ համալսարանը նախատեսում է Հունգարիայի կրթության նախարարության հաստատմանը ներկայացնել առանձին հայագիտություն մագիստրոսական կրթական ծրագիր:

Այսպիսով, գիտական և կրթական համագործակցությունը Խ.Աբովյանի անվան հայկական պետական մանկավարժական համալսարանի և Հունգարիայի Պիտեր Պազմանի անվան կաթոլիկական համալսարանի միջև և հատկապես այդ համալսարանում Հայագիտության ամբիոնի հիմնաում և առաջիկայում նախատեսվող հայագիտություն մագիստրոսական կրթական ծրագրի բացում, կարևոր քայլ է ոչ միայն Հունգարիայում, այլ Եվրոպայում հայագիտության զարգացման ուղղությամբ: Հայտնի է, որ հատկապես վերջին տարիներին աշխարհի շատ հայգիտական կենտրոններ ու ամբիոններ տարբեր պատճառներով կամ փակվում են, կամ էլ փակման եզրին են: Ներկայում օրակարգային խնդիր է օտարազգի երիտասարդ հայագետների պատրաստումը: Ուստի հայագիտության ոլորտում հայկական ու հունգարական համալսարանների համագործակցությունը և Հունգարիայում բարձրագույն ուսումնական հաստատությունում առաջին անգամ Հայագիտության ամբիոնի հիմնումը նոր էջ կարող է բացել հայագիտության զարգացման ասպարեզում: